

平遙縣志卷之一

地輿志

平遙爲陶唐遺墟地僅百里而西通秦隴北達燕京
洵乎腹地要區邑稱繁劇也秦漢以降稱平陶至後
魏而改稱平遙焉我

朝定鼎以來幅員之廣超越前代平特彈丸之區耳而
溯中天之盛尋封國故處猶見遺風未泯也是故仰
觀於天而知分野之所屬俯察於地而知疆圉之所
在而且東南之超山聳翠聿助文明西北之汾水環

流足資灌溉使其勤儉克持古道可以長存奈何俗
尚浮華奢風竟致靡極也尙望賢良司牧振風厲俗
力返古初醅樸之風焉斯幸矣

沿革

平遙古陶地帝堯初封於陶卽此春秋時屬晉戰國時
屬趙秦漢始稱平陶屬太原郡東漢屬西河郡晉仍
屬太原後魏以太武名燾改爲平遙屬西河後周省
隋復屬介休唐屬介州貞觀初屬汾州後屬太原府
宋真宗仍屬汾州後屬太原金元復屬汾州明萬曆

二十四年改汾州爲府仍隸焉

國朝因之

沿革續編

禹貢屬冀州

爾雅釋地兩河閒曰冀州蓋舉東河西河言之古黃河自大伾山西南折而北界充冀之閒爲東河折而西界雍冀之閒南流爲西河

周職方氏屬并州

河內曰冀州正北曰并州馬鄭注虞夏書並云舜以

冀北廣大分置并州

春秋時屬晉

古地名之見左氏春秋及國語禮記者曰隨曰鄔曰九原隨介休東境即平遙西境鄔介休東北境即平遙西南境九原平遙東境今絳州北二十里有九原山和順縣西北五里又有九原山忻州西有九原岡地志皆援國語禮記之文考漢興增陵於九原下故曰京陵因左氏春秋其處者爲劉氏而推本於士會漢猶近古以士會之葬在此或未盡無稽且與士會

之食邑在隨地相比近則趙文子與叔向所遊宜繫之此矣再酈道元水經注云侯甲水西北流逕祁縣故城南又西逕京陵故城北於春秋爲九原之地無疑

秦漢始稱平陶兼京陵中都二縣及鄆縣地並屬太原郡

平陶故城在今文水縣西南二十五里京陵城在縣東七里中都城在縣西北十二里而鄆縣之地自晉永興後分入平介兩縣矣

北魏奄有并州諸地徙置漢平陶縣於今縣境改陶曰遙京陵省入焉別置中都於今榆次縣境

元和郡縣志平遙本漢平陶地案漢平陶故城在今文水縣境西南魏雖徙置西北境猶漢故地地形志所謂平遙城者卽漢平陶城也又案今平遙縣城北二十里及文水境五十里及文水縣城而漢平陶故城在文水縣西南二十五里於今縣境爲甚近可見平陶故城雖入文水平陶故地未必盡入文水也舊唐書地理志魏因太武名燾遂改陶爲遙唐魏王泰

括地志中都故城在平遙縣境西北爲漢舊縣榆次縣東十五里亦有中都城蓋北魏所置之中都與漢中都遠隔

隋析置清世縣大業初省入焉屬西河郡

隋書地理志西河郡平遙開皇十六年析置清世縣今之城當卽隋之清世也蓋平陶京陵中都舊志及府志各有指地惟清世無稽今之縣治又不知建於何時以此參考其爲清世可知

唐以隋西河郡爲汾州爲平遙屬汾州之始汾州隸河

東路

唐書地理志河東路汾州領縣五平遙其一也舊唐書地理志汾州隋西河郡義旗初領隰城介休孝義平遙其年割介休平遙二縣屬介休郡武德元年以介休郡爲介州西河郡爲浩州三年改浩州爲汾州貞觀元年以介休平遙屬汾州天寶元年改爲西河郡乾元元年復爲汾州

宋仍屬汾州靖康後地入於金

宋以太平興國四年滅北漢始有其地而靖康以後

卽入於金自宋以後雖汾州之所隸代有不同而平遙爲汾州屬縣則皆相因不改

明升汾州爲府仍隸焉

明史地理志平遙初屬汾州直隸布政司萬厯二十三年升汾州爲府屬山西承宣布政使司又設冀南道駐此平遙仍屬焉

國朝順治三年冀南道裁隸冀甯道餘因之

分野

禹貢冀州之域星分參井鄭子產曰堯遷實沈於大夏

主參臺駘能業其官顓頊嘉之封於汾川蓋臺駘汾神實沈參神也則汾之屬在參又通志云太原參井今雲中代郡皆度入東井上黨高都爲觜參之屬陶舊太原應在參井之間

通志曰太白屬金西方之星也辰星屬水北方之星而三晉興焉續漢志注曰辰星主常山主冀幽并太白金主奎婁胃昂畢觜參唐書實沈以負西海其神主於華山太白位焉大梁以負北海其神主於恆山辰星位焉又曰燕齊侯辰星占虛危晉亦侯辰星占參

伐秦晉好用兵復占太白邊塞數侵獨占辰星雖其說微有不同而西方金位北方水位則固不易之論也

朱太史之俊分野辯曰分野之說原妄古今相沿不得不從也外史曰聖人別九州而紀地所以配天之文也非緣星而紀也星辰之茫昧未嘗屑屑然而爲之分誠哉是言今以分野宮度論之明厯畢六度過申西厯畢八度過申明厯井八度過未西厯井初度過未是申宮并無井度矣且參七星伐三星共十星

參原十度觜止半度今

西

厯增觜爲十度而參度反

刪其九則在天止有參星一度耳參星雖削晉益猶

附則今晉益屬參無疑也益實是蜀蜀與晉相隔甚

遠而分野則同亦如齊魯接壤而魯屬西方奎婁之

分齊屬北方虛危之分中隔亥宮三十餘度宋衛接

壤而衛屬北方室壁之分宋屬東方房心之分中隔

燕吳齊三宮九十餘度地近而天遠之地遠而天近

之皆理之不可曉者若謂益不係蜀作阨字解則十

二宮中竟缺四川一省矣再詳之

汾陽志曰汾古西河地冀州之域春秋以晉屬參未
始專以參言汾也及秦以西河隸太原郡亦得繫之
太原畢分太原昴畢分星也唐以西河屬河東郡亦
得繫之平陽參分平陽觜參分星也史記謂秦地於
天官東井輿鬼分野其界內有西河則西河又得繫
之井分星矣山西通志謂觜參實沈之次於辰在申
晉魏之分也而井宿附焉晉天文志曰自畢十二度
至井十五度爲實沈分野據山河以考之汾地西河
北距太原界七十里太原晉魏分也得不分星畢乎

南距河東平陽界百二十里平陽魏分也得不分星
參乎西距陝西吳堡界二百九十里吳堡秦接西河
分也得不分星井乎按宋史天文志參星十度右足
入畢十三度又參九旂星在玉井東北玉井四星在
參西左足下東井南軍市十三星在參東南觀其鈞
連曲屈之狀夾維環拱之勢是汾雖主參而得於畢
者十僅一之餘得於井者十則二之餘又不得以疆
界遠邇爲概也在左氏子產雖曰堯遷實沈於大夏
主參臺駘能業其官顓頊嘉之封於汾川由是觀之

臺駘汾神也實沈參神也此汾陽舊志所引而止以
汾屬參野殊未之深考矣則爲汾志天文之言者宜
曰汾在天文參度下入井分二之餘而兼畢分一之
餘焉論斯允當歟如有按星經詰之者曰星有星氣
氣有初有中終度有度里凡天一度爲二千九百
三十三里七十一步二尺七寸四百七十八分分之
三百六十二試察汾地所受星氣之各有淺深所占
度里之孰爲廣狹乎則將應之曰星家有專術是則
闕焉以俟後之達天學者

汾州志云晉天文志自畢十二度至井二十五度爲
實沈魏分野則汾固冀州之域天文參之度也大都
地有名鎮天有分星謂汾屬參野者固不敢不然謂
汾必屬參野者亦不敢盡然此其理介在可知不可
知之閒哉惟修其在人者聽其在天者則幾矣

疆域

東至祁縣盤陀八十里

南至沁源縣界六十五里至沁源二百二十里

西至汾陽縣界四十五里至汾陽八十里

北至文水縣界二十五里至文水八十里

東南至武鄉縣界六十里至武鄉二百里至潞安府三百八十里

西南至介休縣界三十里至介休八十里

東北至祁縣界二十五里至祁縣五十里至徐溝縣一百一十里至太原府一百九十里

西北由汾陽文水縣至岢嵐州三百里

江南路自縣而東南達之陸路二千四百里

京師路自縣而東北達之陸路一千三百里